

chen: Ich wil dir viel schmerzen vnd kummer machen / vnd man-
nigfaltigen deine Kindertracht: Du solt mit kummer vnd schmer-
zen deine Kinder gebeeren / vnd vnter deines Mannes gewalt sein /
vnd er sol dem Herr sein / r̄.

Weil wir denn alle also mit schmerzen vnd kummer auff die
Welt kommen vnd gebohren werden / kan zwar nicht allein der
Mutter / sondern auch der Frucht in Mutter leibe auß vngeschick-
ligkeit / vnd zu zeiten durch verwahrlosunge / bosheit vnd vntrew-
etlicher Hebammen / viel vbel / vnglücks / vnd vnrachts / wieder-
fahren vnd zustehn.

Darumb denn fürnemblich der Magistrat vnd Obrigkeit
gebühren wil / in auffnehmung vnd erwehlung einer Hebammen /
zu sehen vnd fleissig acht zu haben / ob dieselbige / so auffgenommen
werden sol / eine Erbare Gottsfürchtige Fraw sey / ob sie sich zu-
vor ein zeit zu andern Hebammen gehalten / vnd von ihnen was
erlernet habe / ob sie lesen / schreiben / vnd in Arzneyfachen / zu der
Geburt vnd niederkunfft nützlich vnd dienstlich / erfahren / geübet /
vnd die jenigen zufall / so sich bey den Gebeerenden zutragen möch-
ten / sicherlich / vnd mit bescheidenheit / in der Niederkunfft vnd
Geburt wenden / auch guten bericht vnd schnellen Raht / in gefehr-
lichen sachen geben könne / ob sie sauber am Leibe / erbahrer gestalt
von Angesicht / starck vnd arbeitsam / gliedmässig / gerad / vnd ge-
lenck an Armen vnd Henden / damit sie mit handgriffen vnd ihrer
geschickligkeit / desto besser vnd fertiger mit der Mutter vnd der
Geburt könne ombgehn / ob sie eines ehrlichen Lebens vnd guten
Wandels / züchtig von sitten / fleissig vnd vnuerdrossen / nüchtern /
munter / vnd vnuergeffen / nicht neidisch / hässig / haderisch vnd
zänckisch / nicht vngedültig / frech / stolz vnd hoffertig / nicht trozig /
bolderisch vnd mürrisch mit worten vnd geberden / sondern sanfft-
mütig /